



十四

01333

丁文誠公奏稿

卷之十四目錄

議結鄰水等五州縣教案片 光緒三年十月十一日

英人吉爲哩等游歷情形片 同日

英人窺探西藏陸路情形片 同日

覆核沈葆楨包饟立限摺片 光緒三年十一月二十九日

請飭准商整理皖西引岸片 同日

馬邊夷務肅清摺 光緒三年十二月二十日

籌款修理都江堰工摺 光緒三年十二月二十八日

川省設立機器局片 同日

濟楚川鹽礙難加抽釐金摺 光緒四年二月二十日

江長貴安徽省建祠片 光緒四年二月二十九日

奏銷展緩寬免經徵各縣處分片 光緒四年三月二十九日


拏獲重慶瀘州巨梟片 同日

派員出洋遊歷片 光緒四年四月十一日

革職留任謝恩摺 光緒四年五月初八日

遵旨查覆劉長佑參款摺 光緒四年五月初八日

松潘番民改土歸流摺 光緒四年五月初八日



奏稿卷十四目錄

議結鄰水等五州縣教案片

光緒三年十月十一日

再光緒二年九月二十六日前成都將軍臣魁玉前護督

臣文格准總理各國事務衙門咨光緒二年九月十二日

奉

上諭總理各國事務衙門奏川省民教滋事各案請飭該省迅速持平辦理一摺川省民教仇殺據法國使臣稱傷斃教民二十餘命槍燬二百餘家與魁玉等函報該衙門情節不盡相同此外該省鄰水南充巴州營山等處民教滋事尙有四案是川省民教積不相能日與尋仇深恐釀成禍患現在魁玉等函報該衙門內江縣有團民殺斃教民之案鄰水縣有教民殺斃團民之案均有折燬教堂之事法國使臣卽有鄰水教案請爲保護之詞亟應迅速持平辦結以弭釁端近來中外交涉事件甚多措置稍有不當卽致枝節叢生不可收拾該省教案層見疊出尤當設法妥辦早爲完結以靖地方等因欽此同日內閣奉

奏稿卷十四

一

上諭四川省民人與該處教民挾嫌構釁案犯到官地方官自應將滋事根由確切訊明秉公迅速辦結何得日久拖延乃該處江北廳及內江鄰水南充巴州營山等處均有民教滋事之案未據訊結殊屬延玩著成都將軍四川總督督飭該地方官迅將各案查訊明確持平辦理並隨時分別良莠撫綏彈壓毋任尋仇生事以靖地方等因欽此當經魁玉文格欽遵轉飭各地方官妥辦未經辦結

臣

寶楨到任後查各案懸擱已久若再遷延不結竊恐枝節橫生當卽督飭署成縣道丁士彬川東道姚覲元並派委委員赴各該州縣查辦去後茲據該委員會同地方官先後將議結緣由稟詳到案查巴州之案訊緣同治十三年三月閒州民董郎賢與團眾赴教民楊明玉家搜捕竊匪李大春維時團鄰人眾順將楊明玉家錢物攫去楊明玉不服捏詞滋訟因董郎賢係案內緊要首被遠質未歸未能訊結現經其母董喬氏遣姪喬昭然代質董喬氏願給楊明玉錢二百四十千以作賠償之用繳由楊明玉具領結案此案訊係一人一事尙無重大情節至南充營山內江鄰水四案均有打燬教堂折燬教堂之事南充之案訊

奏稿卷十四

二

由光緒元年五月閒該司鐸劉多默先行因事他出黃昏時不知何人將教堂打燬劉多默原控蕭用謙等率同團丁打燬亦係懷疑並無證據不能斷令賠償營山之案訊因是年縣試歲考應試童生往觀教堂經該堂看司阻止激成眾怒所致並無預謀主使糾燬情事該司鐸彭若漢指控之鄭朝樸等經該委員等提同人證再三研詰均稱並未在場而該堂之看司當打燬之時早經避禍遠匿又不能指出首禍之人當時既人多且雜今又事隔兩年更屬無從追問未便格外苛求致滋拖累內江之案訊係教民彭志順等誣平民楊正煥毀教將其私押勒罰錢文以致眾圍不服將教民彭志順鄒貴賢殺斃乘勢將城內教

堂折燬雖經查明係梅喜老么主首與受害之楊正煥將彭志順致斃而該二犯又早逃逸無蹤一時未能獲案無從訊辦鄰水之案訊由教民王同興糾黨多人夤夜至馮大洋家搶毀財物焚燒草堆殺斃馮賢貴賴洪順張塩三命殺傷會有元一人教民被害者只劉大裕一人以致闔邑驚惶互相聯絡倡言逐教並將各處教堂及城內教堂一併拆燬計被燬教堂五處被燬教民房屋不下一百餘家維時各處棍徒乘機混入有藉團逐教任意擄掠者有非教而指爲教肆意抄毀者人多勢眾究竟是民是匪當時未能區別而王同興一犯或云被團戕斃或云業已遠颺至今查拏無蹤無從究詰該委員與該地方官以該司

奏稿卷十四

三

鐸等原控各情及主教洪廣化原呈雖不免張大其詞而各處之教堂被燬房屋被燒眾目共覩究屬實有其事且鄰水教民畏禍遠避將近兩年其流離困苦不堪言狀情實可憫而各教民之不能回歸者其一切日用係由主教洪廣化墊賠均有底帳可核情亦難堪惟現辦此案既不可抑勒平民強令賠還又未可偏枯教民不爲剖決現在案懸日久兇犯既無著落若再遷延尤恐別滋他事惟有寬其既往做其將來當卽諭令該主教司鐸等毋庸狡強就案酌中議結所有被燬教堂量給修資教民亦酌加撫恤俾民教兩得其平從此釋嫌疑而敦和好現查看折燬教堂之工費酌量議給南充縣銀四百兩營山縣銀二

千八百兩內江縣銀四千兩以作修理各處教堂之用至鄰水縣一案折燬教堂五處焚燬房屋一百餘間且有乘機搶掠之事衡情酌理被燬之教堂既須照案賠修而被燒之民房多至百餘間且失去財物數亦不少教民均係中國赤子更不能不量予撫恤是以酌罰從前延不查辦之知縣李大林銀七千兩並再酌加銀一萬六千兩共給銀二萬三千兩以作修理五處教堂與撫恤被害各教民之需該司鐸教民等均各悅服卽令出具永不翻異滋事重敦和好切結並備具領狀申齋前來臣查各該縣教堂被燬事實情真查教堂係洋人所修工費不貲今被各團民所燬自應著落各團民賠還方昭平允惟賠修之款甚

奏稿卷十四

四

鉅難派殊難且團民與教民結怨已深若再勒令賠修教堂心必不甘則此後民教之仇愈固結而莫解所有修費自應由官酌給不必派累百姓以期日久相安惟鄰水一案所議之數甚鉅但據該委員與該司鐸逐款分晰其中賠償洋人教堂者無幾大半皆撫恤教民之需非供司鐸等之中飽查教民均係中國百姓未便歧視臣等當卽允如所請照所議之數於釐金項下分別撥給各司鐸等具領完案惟民教滋事總由不遵條約及地方官不爲速理之故現又飭令各該地方官以後遇有民教滋事之案卽爲迅速持平訊斷該主教司鐸等亦不得格外挾制干預期於彼此相安現在川北各處從前未結教案均已一律

議結其因此牽連京控各案亦已銷除毫無膠轕此外惟江北廳與涪州兩案議結稍需時日而涪州之案已有成局僅江北一起輾轉議辦總由川東主教范若瑟主持不定所致現已批飭該主教趕辦並令委員與地方官設法開導似亦不難了結除將現案議結各緣由暨各司鐸領狀甘結鈔咨總理各國事務衙門備查外所有奉

旨查辦之鄰水內江南充巴州營山等處民教滋事各案辦結緣由謹會同成都將軍

臣

恆訓附驛具陳伏乞

聖鑒訓示謹

奏

英人吉爲哩等游歷情形片

光緒三年十月十一日

再駐渝之英人吉爲哩於五月三十日由成都省城起身  
前往西藏一路回國英員貝德祿於六月十六日由省起  
身赴越巒嘉定峩邊雅州甯遠會理州打箭鑪等處至滇  
省一帶游歷均經派員沿途護送並密查該英員等行徑  
先後附奏在案續據護送委員鍾坦來稟該英員貝德祿  
於出省後執意欲去涼山普雄各地方會晤猓夷力阻不  
允因於到越巒時密囑營員喚來城當差之熟夷前來教  
以語言令其到貝德祿寓所故作窺伺貝德祿一見該夷  
卽喚入內給以飲食細詢夷地一切情形該夷兵卽照該  
委員等所教之言回答並以涼山夷人係屬生番見人卽

奏稿卷十四

六

害其語言伊等亦不能知等語嗣由越巒起程沿途所見  
多夷細問情形大略相同貝德祿始信爲真到登相營時  
始不提及前去涼山普雄之語及至瀘沽又以觀星未準  
耽延一日到甯遠府卽由該府另派委員會同護送出境  
至雲南巧家廳交替旋據瀘州知州田秀粟稟報該英員  
貝德祿又於九月十六日與副員麥良臣由滇省富官村  
一帶行走復入川境至瀘州卽日赴合江前往重慶等語  
並據各沿途稟報貝德祿沿途皆密繪地圖行走尙屬安  
靜至吉爲哩一名由省行至打箭鑪出口行抵巴塘本係  
入藏之路茲據該塘委員趙光燮稟報前奉文以英人赴  
藏游歷飭令保護彼時卽聞藏番有阻攔之說該英員到

塘時不欲入藏擬由巴塘赴滇回國該委員以江卡地方與巴塘毗連以甯靜山爲界凡有差事進藏江卡卽派馬隊四出哨探以致巴夷喇嘛亦多附和最易滋事該英員既不進藏卽不必過江卡但恐江卡兵夷越界另生枝節該委員當飭土司飛調馬本傳集士兵又飭蟒里宗俄兩協傲各帶土目蠻兵隨同護送行過邦木塘復飭塘兵馳往甯靜山告以英人係由巴入滇不必驚疑一面卽分路赴甲乃頂前進行過山坳遙見甯靜山下有帳房人馬排立該委員只得在後待吉爲哩等行過始隨後前進幸該處人馬未動只連放數槍隨卽諭令英員趕緊前行幸免無事各等語

臣

查該英員等來川住紮重慶查看通商事

奏稿卷十四

七

宜茲一則由川赴藏又由藏赴滇一則由川赴滇又由滇回川行蹤迄無一定其爲查看道路形勢探明風土人情以爲日後擬由該國陸路出入川境可知但該國由藏入川較之由滇入川須繞行緬甸道路較近緣廓爾喀與英連界僅一山之隔而後藏與廓夷毗連故也

臣

於此次該英員由藏赴國頗爲竊慮因前有西藏探路之約未便阻止當飛致巴塘各委員沿途妥爲查看今以藏番有阻攔之信而該英員乃廢然思返實爲目前一大幸但該英員注意於此以後尤當隨時妥密防範

臣

惟有竭智盡心事

事遏之於幾先藉以上慰

宸廑除會函達知總理衙門外謹附片陳明伏乞

奏  
聖鑒謹

奏稿卷十四

八

英人窺探西藏陸路情形片

光緒三年十月十一日

再英人前有西藏探路之請其用意狡譎臣心竊慮之到川以後恆切切防維思欲暗中設法補救以爲得尺則尺之計此次貝德祿吉爲哩二員明爲查看通商事宜乃徧地游歷或則欲會涼山猓夷或則欲由藏赴國沿途詳繪地圖其幾已見臣竊揣英人之意從前專注意海疆今則二十餘年船礮既極堅利而沿海之地勢人情亦經熟悉自以爲經營就緒惟不通海疆之四川雲南貴州湖南廣西甘肅陝西山西河南數省未能水陸相通彼就目前視之實覺毫無可恃故又欲以向之致力於海疆者轉而用之於西南各省然必擇其與該國最近之省先爲入手徐

奏稿卷十四

九

圖推廣而與該國最近者莫近於蜀滇次之而蜀又爲數省中菁華聚集之所故英人此時用意在蜀蜀得而滇黔歸其囊括矣此實英人目前肺腑之謀也且查川省門戶在前後藏外接披楞卽英孟加拉之屬部披楞又名噶里噶達孟加拉又名第里巴察與後藏相近之阿里皆古東印度地英旣占東南中三印度之半窺伺後藏久矣從前爲布魯克巴廓爾喀之中界哲孟雄邛大山所阻山極險峻中通一綫道光年間哲孟雄屬於英此山已爲英所據前二十餘年海道未甚通印洋煙入川卽由此路彼若此時將山開鑿卽可長驅入藏幸尙有布魯克巴廓爾喀界連前後藏足以爲我藩籬查布魯克巴全境不麗印度廓

爾喀兵力頗強前此英人并吞印度未能侵其寸土至今  
憚之現在英人通藏必由此道此二國足與爲難若將該  
兩國極力羈縻絕英人近交之計則兩藏不失要隘我得  
自固藩籬且查英人從前於北印度取塞哥屬部加治彌  
爾卽有欲赴藏通市之意是其蓄謀已久今若不將布廓  
兩國極力籠絡英人將來必設法相與連和則西藏一無  
屏蔽而川省門戶遂失必恃西北毗近番猺夷地數千里  
以爲界限而番猺各夷貪而無親誠恐英人啖以金錢則  
川省事勢破裂所關非淺臣日夜籌計所以前奏欲在甯  
越附近夷地一帶試辦開礦非爲牟利實欲藉此聯絡番  
猺夷人爲先發制人之舉但恐力量不能遠及寢食難安

奏稿卷十四

十

竊查洋人入川情勢實爲中國陸路一大關鍵未可視爲  
末務臣愚以爲欲圖內地之安則境外之藩籬必先自固  
蜀之門戶在西藏而西藏之藩籬在布魯克巴廓爾喀今  
廓爾喀本遵例入  
貢臣服維虔惟布魯克巴久未貢獻此時若將廓爾喀厚  
爲羈縻而

密飭駐藏大臣設法修好於布魯克巴陰爲外助則自可  
以伐英人入藏之謀此必然之勢况布魯克巴本於雍正  
年間准其內附今若

殊恩遠沛准令聯舊日之情該國必將感激効順夫此舉  
因利乘便在我第行所固然非同創局他人卽不能藉生

異議細審前後情勢似應早爲酌辦毋令彼族得以播弄暗中撤我藩籬也至將來洋人如有請於蜀滇兩省開廠及由川赴藏通商各事似須設詞婉拒令彼水陸不能相通庶知有忌憚不敢遽行思逞其關繫全局實與海防相爲表裏臣愚昧之見是否有當謹附片密陳伏乞

聖鑒訓示並

密飭總理衙門妥慎議行再廓爾喀本屬遵例入

貢臣因山陝徧地饑荒道路不能暢行已據情奏懇

恩施准予暫免一次如以臣說可採可否於此次暫免外特沛鴻施厚加

賞賚用示懷柔之處恭候

奏稿卷十四

七

聖裁謹

奏

覆核沈葆楨包饒立限摺

光緒三年十一月二十九日

奏爲覆核兩江督臣沈葆楨奏請包饒立限收復引地一摺操之過蹙窒礙難行恭摺據實具陳仰祈

聖鑒事竊

臣

接准兩江督

臣

沈葆楨咨送包饒立限收復

楚岸引地並議覆部議淮商先籌銀五六十萬兩解川以

備開辦滇引之用各摺片稿到川咨明妥議具奏又准湖

廣督

臣

李瀚章咨送議覆江督章程未能允洽並附奏禁

川復淮關繫數省大局各摺片稿到川

臣

詳細披閱在沈

葆楨總理淮綱亟圖規復舊制遂有包饒立限之議爲淮

商計兼爲川鄂計非不至周且密

臣

等曷敢不秉公辦理

和衷共濟顧作事必準乎人情則推行鮮窒求治必因乎

奏稿卷十四

三

時勢斯成效可循如原奏所稱包饒立限兩事

臣

愚以爲

名則是而實則非也查口岸商人領引認課是其專責然

必引銷而後課足如引銷不足額則爲積引鹽務定章原

准其分年帶徵未聞令按年包認誠爲天理人情之至夫

課屬正供尙無包認之理若饒則非商人應完之款款非

其所應完而必勒之以按年包認彼商人持本求利本一

而利十猶將不足若利未形而本先折其誰願之聞今日

淮商售鹽每引獲利甚微茲因復岸而勒令包饒就現在

楚岸計之虧本實甚虧本以謀利淮商獨非人情乎顧或

者曰包饒旣於商不順該商又何以具結包認曰是殆迫

於目前之權勢不得不面從以塞責且亦熟計包認之後

卽解不足數官究無法以束縛之耳商人狡獪伎倆每出  
恆情之外以利誘之方且故爲觀望以勢迫之何能踴躍  
輸將現在川鄂京協各饌恃鹽釐以爲大宗若一旦舍隨  
時有著之款而仰息於懸而無薄之商設使包認之後解  
繳不足問之商商則曰局中代扣商不得知也問之局局  
則曰鹽未售出銀無從扣也不得已而咨之江督則又曰  
行局飭商趕緊扣解也彼此輾轉推延而指撥之款憑何  
取給急用之時將何指望乎此則包饌之說誠不可據爲  
定論也至臣興辦黔邊本屬川省分內之事現在始基甫  
創一切經營會無把握安敢遽作復淮之想且黔中兵燹  
二十餘年民靡子遺村市爲墟銷路尙須新開口岸豈能

奏稿卷十四

三

驟復臣此次試辦實因清查邊計各引積滯過多課羨無  
著而且川東之私梟日熾黔省之招復倍難故極力爲此  
冀將川商徐導入黔爲得尺得寸之計以維川黔大局而  
創辦非易卽運本一項前奏借撥鄂東兩省銀四十萬迄  
今竟成畫餅不得已暫就本省藩鹽道各庫暨各州縣發  
商生息項下勻湊銀三十五萬兩先行開辦而持此涓滴  
有限之本銀以籌一萬數千之邊引前空後竭辦事之員  
掣肘萬狀卽使寬以年月尙恐不能著有成效是以臣前  
奏試辦黔岸卽將濟楚不能遽停預爲陳明今沈葆楨乃  
謂臣辦黔邊已存讓淮之心遽請以此奏奉

旨之日卽爲禁川立限之始是其急於復淮遂不暇將今

日黔岸之荒廢及臣試辦之艱難一爲深長思耳且禁川之舉以現時情勢籌之實有萬難遽行者臣從前熟聞復

淮之議比到川後卽經派員詳查始知川省井竈鹽積如山而託井竈爲生者卽自流井一處已不下百餘萬眾加以船戶水手又不下數十萬眾率皆貧極無賴之徒朝不謀夕平時卽虞其滋事刻加防閑至向井竈商人微示以禁川入楚之意則僉稱川井之開楚鹽之行從前皆奉文招徠並非私辦今何以忽行禁止必無其事愚頑之民眾口一詞其理似勝卽臣此次議辦黔岸各井商不知底蘊卽謂黔岸舉辦濟楚將停萬眾交譁訛言四起經多方示諭始就安帖而疑團不釋心尙皇皇夫辦理黔邊與禁川

奏稿卷十四

十四

入楚何與而井商已刻不自安若禁川之議必行則百數十萬無業之民生機頓絕勢將鋌走川鄂之禍決可立見是不惟復淮不能行將黔岸亦不能辦而亂機一動亦恐非旦夕所能藏事方今西陲軍務未靖尚需重饜而北路山陝豫各省已成普災饑民徧境賑撫無術逃入川境求食者絡繹於途大可隱憂川省近接秦晉設因此有意外之事恐一呼四應其害將不止於川鄂大局所關實非淺鮮時勢若此更不可不長慮而卻顧也至原奏謂楚岸爲二百年來淮商固有之引地而責之以

祖制不可違

國計不可誤誠爲至論惟臣竊思淮南楚岸當我

列祖

列宗承平無事之時大經大法普天臣民同此遵守誰敢更易迨我

文宗御宇適值東南不靖淮鹽梗塞楚民淡食不得不以川鹽濟之其後百計招致商運漸開又復藉釐助饒削平大難由今思之安得謂率由舊章者爲是而變通盡利者遂爲非也查此次李瀚章覆陳各情剴切周詳洞澈利害

臣亦何庸多贅惟沈葆楨以臣此次辦理黔岸卽欲立限

復淮如果事屬可行臣等萬不敢稍存畛域置淮巇於不

問且臣正擬疏通邊引亦可藉此一舉移濟楚之商轉而

運黔事機豈不甚便無如時勢殊多窒礙臣實不敢稍爲

奏稿卷十四

五

遷就貽患無窮計惟有實力措辦黔邊俟將來銷路漸開漸暢可以與楚岸相敵彼時川商之濟楚者或可使漸歸本岸則不必亟議復淮而淮自復似較之目前強辦形格勢禁者實爲有利無害用力少而成功多也至另片覆陳部議淮南先籌銀五六十萬兩解川以備開辦滇岸之用一節查沈葆楨所陳情形似已有爲難之勢臣逆揣淮南

亦恐難集此鉅款卽使淮南慨允湊解而川省以應辦本岸累及隔省商人於理未順於心何安且此時初辦黔邊滇岸係屬緩圖但使黔岸自此順手逐漸暢銷則黔岸現在之運本日後挪之以辦滇亦足資應用正無須苦累淮南商爲此不情之舉也所有包饒立限禁川入楚窒礙難行

未能遽辦各情形臣愚昧之見是否有當謹據實縷悉恭摺具奏伏乞

皇太后

皇上聖鑒訓示謹

奏

奏稿卷十四

請飭淮商整理皖西引岸片光緒三年十一月二十九日

再臣於同治十三年請假回黔道出金陵晤前兩江督臣

李宗義論及兩淮鹽務臣以爲淮鹽向分皖西鄂湘四岸

鄂湘爲川分占無怪銷數不旺第不識皖西近日能疏通

否李宗義謂現在行票不免散漫亦未遽行通暢等語迨

臣上訴皖江隨處諮詢僉稱官票之鹽實不及販私之夥

推尋其故則云票無總領來去可以自由雖設局督銷從

無足額之日果如所言則淮岸之爲病尙不盡在湘鄂也

查皖西本兩淮專岸爲今之計如果皖西尙滯似不若商

之淮商令其設法先行整理俾切己之專岸有著則銷路

漸暢引課自增如此辦理數年則臣所辦黔岸亦稍有頭

奏稿卷十四

七

緒然後徐將濟楚川商漸引歸黔默化潛移不求欲速於

淮鹽不致過慮滯銷於川商亦不致過形操切似爲淮川

兩便之道愚昧之見未敢自是謹附片具陳可否

飭下戶部核議咨行兩江督臣查明酌辦伏乞

聖鑒訓示謹

奏

馬邊夷務肅清摺 光緒三年十二月二十日

奏爲查辦馬邊夷匪迭克沙匡一帶堅巢夷眾畏威投誠現已及時戡定全境肅清恭摺仰祈

聖鑒事竊 臣寶楨前會同成都將軍 臣魁玉將馬邊夷匪

負隅抗拒經官軍迭次進剿收復核桃各汛地辦理得手

緣由恭摺奏明在案嗣於光緒三年八月二十二日欽奉

上諭著丁寶楨飭令各營乘此聲威迅將沙匡一帶聚匪

盡數殲除毋留餘孽一面安插降眾解散脅從妥籌善後

事宜俾地方日臻安謐等因欽此謹卽轉飭各營將領暨

該廳營等一體欽遵辦理去後 臣寶楨諭知沙匡一帶爲

各支悍夷麇聚之所肆擾內地均由此出沒而附近之土

奏稿卷十四

六

地坳鑽天坡觀音巖等處天生奇險該夷等倚爲門戶以拒官兵此次進剿沙匡必先攻堅奪隘乃有進步前派候補道周振瓊所部靖武全軍在防日久兵力不無疲乏恐難得力當將該營調回省城暫予休息另派副將銜儘先參將李培椿統領所部壽字三營前往接剿會同各營將領籌商妥辦仍恐兵力尙單又調管帶達字中營遊擊張祖純督率所部馳往馬邊歸統領達字營總兵張祖雲調遣以期厚集當經分別檄飭遵照仍於批牘中再三嚴飭穩慎進取切勿爲賊所乘致傷精銳而損軍威茲據李培椿張祖雲署馬邊協副將賡良署馬邊廳同知周儕亮等會稟稱查沙匡夷巢居廳城及左右兩營之中從前平靖

之時本有數道可通因被夷人侵占盤踞多年去廳城十里以外卽成老林現只有兩路可通皆係崎嶇窄徑閒不容足各營欲勦辦沙匡仍應分兩路前進而路徑又苦於曲折難尋周儕亮當卽捐資添募本地團勇十哨以作鄉導分四哨歸李培椿節制由左路引導進攻沙匡之前分三哨歸張祖雲節制由右路引導進攻沙匡之後其餘三哨歸辦團委員蹇誥節制帶赴黃茅岡一帶紮營相機策應賡良亦派外委黃吉祥黃占先分帶制兵赴大有汛走馬汛兩處協同堵勦提督胡國珍仍駐左營總兵劉順望仍駐右營撫綏已降夷支兼防意外之變總兵李忠楷仍紮原壘以防該夷撲我後路並密於三營中抽隊助勦分

奏稿卷十四

九

布已定約於九月初一日爲進取之期凡兵勇團練均令裹帶十日乾糧隨進隨紮有進無退李培椿抵花椒坪磨子坪兩處相度地勢遙見對山土地坳危巖聳立最爲奇險中有一綫可通乃進攻沙匡要路其三面均係峭壁無徑可以繞襲乃派勁卒躡探該夷匪已於坳上添修碉卡數座豎立木柵排列插石爲禦敵之具李培椿以我軍非先奪此隘決不能進搗沙匡當飭武字營總哨唐珊峰壽字中營營官游名揚廳勇哨長凌太川各率隊伍由磨子坪跨山而下順巖以攻其右壽字前營幫帶胡超羣中營哨長黃仕明及管帶廳勇熊家恆率領哨隊鄉導從花椒坪而進以擊其左李培椿自領營官汪期紳並率團勇彭

國恩等由土地坳中路迎頭截勦並令副將陳貫甲參將李修德各帶勇丁緊相接應以防夷匪於別徑繞撲後路八月三十日四更卽整隊前進將抵土地坳時天尙未明李培椿逆料該匪必有埋伏當飭各勇將槍礮備齊銜枚疾走及抵坳下果有夷匪千餘人突出我軍大聲吶喊出其不意槍礮齊施轟斃悍夷數十名各匪不虞官軍猝至驚潰回坳搗石雨下時我軍已經深入皆不避生死攀藤附葛拋擲火蛋火箭其坳上碉柵被火然燒煙燄彌天夷匪不能抵禦我軍一鼓直上乘勢追殺直逼沙匡逆夷傾巢而出時左右兩軍亦由後接踵而下李培椿分三面夾擊詎夷匪見老巢爲官軍所逼拚死格鬪兇悍異常鏖戰

奏稿卷十四

三時之久殲斃悍匪數百名落巖墜澗者不計其數該夷猶抵死衝突李培椿又暗撥精銳二百名橫出沙匡之後抄襲夷眾見後路官兵又進始行驚亂四散我軍乘亂衝殺皆如猿升木盡往老林竄匿當將沙匡堅巢立時攻克其順河一帶夷棚數千間悉數焚燬遙見右路之軍亦由對岸轟擊而來正督隊接勦閒適值大雨且天色已晚只得收隊卽就沙匡駐紮逐日派隊接勦伏匪伐樹焚山以清內地此左路九月初一日搶奪土地坳隘口及攻克沙匡之實在情形也至右路則以鑽天坡觀音巖爲要隘張祖雲先知會劉順望抽撥精銳交百長楊光雲等帶至走馬坪助勦又飭張祖純督帶親兵並百長邢有能等協同

團勇三哨於初一日黎明由魚濠口進攻沙匡之後一面調撥駐白羊溝之新前營總兵黃三秀幫帶營官章世榮中營百長熊吉良各抽六成隊伍派定章世榮領作頭隊黃三秀爲二隊張祖雲自領親兵與管帶廳勇曾佐賢爲三隊均於八月初十日四更拔隊由白羊溝進勦鑽天坡等處九月初一日黎明督隊齊至白羊山坳下卽屬密箐老林無路可走各軍斬茅開路穿過深箐僅有小路一道已被夷匪用木石攔斷草內徧釘鐵籤前隊不知受傷二十餘人嗣各隊繼進隨拔隨走歷盡艱危於午刻抵油石溝夷巢該夷亦不虞我軍之冒險突至也倉卒迎敵被章世榮洋礮環攻而黃三秀又由鑽天坡下面循路抄至賊

奏稿卷十四

三

後我軍勇氣倍增夷眾不支四面潰逃張祖雲揮隊追勦殲斃悍匪百數十名焚燬蠻棚一百餘座當將油石溝奪獲正擬進攻鑽天坡日暮大雨山霧迷漫暫行收隊在坡下結營露宿次日雨甚霧密難於出隊初三日雨止霧收卽飭黃三秀等各督哨隊進攻鑽天坡各弁勇奮力死戰以槍礮連環互進先搶上觀音巖守隘各匪併力抵敵我軍用噴筒火箭同時並發沿燒夷棚該匪見勇氣甚銳不能抵禦退竄老林當於是日已刻將鑽天坡攻克而觀音巖亦隨同奪據該兩處山勢極高憑眺俯瞰遙見沙匡夷巢已被左路諸軍克復張祖雲擇要扼險卽在鑽天坡觀音巖油石溝白羊溝沙匡等處分隊立營以資聯絡逐日

抽隊焚山刊木搜勦匪周儕亮又添製火藥鉛彈繩索多備斧鋤鉤鏟等器分運各營搜山清野此右路九月初一初三等日奪據觀音巖及攻克鑽天坡等處要隘之實情也各營查驗我軍受石傷弩傷籤傷者百五十餘人幸未陣歿一人奪獲夷匪刀矛皮甲氈衫一千數百件焚燬蠻棚二千餘間先是周振瓊等收復核桃汛地後卽有白瓦捏別阿奴等家三支夷酋肉袒牽羊詣營求撫嗣又有小木千了花兩支亦來營乞降經該將領等優加犒賞曉以利害責令清繳漢人退還侵地兼縱令回巢徧告各夷支示以威德而住牧涼山各大支及附近之兒馬吼卜惡莪等支恃其險遠以爲非兵力所及抗拒依然幸自攻克

奏稿卷十四

沙匡以後險隘堅巢盡失該夷無可負固遠近震動十一月初十日內外左營八支右營十五支黑夷均先後來營乞降爭繳出從前擄掠之漢人四百餘人其餘仍自認陸續清繳二十三二十六兩日左營齊集黑白夷三百餘人右營齊集黑白夷四百餘人跪求敵血爲盟永遠投順該將領文武等猶恐該夷未能真心歸降先爲之定立條約逐款解說與該夷通事人等令其詳細告知如願遵從卽准受撫儻有不願各卽回巢聽候痛勦該夷等均以前叩地哀鳴不起該將領見其真誠乃嚴整隊伍在於廳城外校場受降該夷等均各領酒敵血誓不復叛馬邊廳全境暨左右營地面均已一律肅清等情會稟前來臣等伏查

治夷之道原無盡滅之理故歷來善治夷者惟在以靜治動以逸待勞不能純任兵力蓋得其地不足爲利得其人不足爲用而頓兵耗財與犬羊角勝負殊爲無益然大示以兵威則無以懾其心而撫亦斷不可恃馬邊一帶內外黑白諸夷自道光中年倡亂以後用勦用撫不下二十餘次而旋勦旋撫旋叛且有此方就撫而彼已復叛者及至咸豐四年核桃汛各處被夷占踞後迄今二十餘年數百餘里之鄉場村寨竟成夷巢漢民死亡流離慘難言喻現雖有左右兩營均孤懸在一百數十里以外與廳城聲息不通其勢已成贅瘤不過夷人尙藉此以爲與漢人交易煙茶布粟之地故略而不取耳若非采入其阻大張撻伐斷難望其俯首服從相安無事今幸仰仗

奏稿卷十四

三

天威將領奮勇士卒用命先收復核桃汛地以扼其吭繼殲除沙巨聚匪以孤其勢而又將土地坳觀音巖鑽天坡等極險要口全行奪據遂使內外二十三支夷眾動魄驚心先後歸附卽住牧涼山各支以及較近之兒馬吼卜惡莪等支亦不敢恃其險遠率眾懇降及時戡定全境肅清此後地方官如能撫馭得宜可期烽燧無驚邊陲永靖

臣

等現在惟督飭該將領廳營等勒令將以前搶去漢人全數清繳安業並責令各支黑夷上班當差以爲要質其一切建碉築安業並責資捍衛內地之處已飭該將領及該廳文武各官趕緊次第切實舉行以期一勞永逸惟

臣

此次辦

理夷務詳審各該夷易於叛亂各情大約以支數太多夷戶日眾頗有各爲雄長不相統率之勢將來似須設立土千百戶及土酋長土目各項俾其有所鈐制庶在彼乃各有所統屬而在我亦得以專責成方臻妥善容臣詳細酌度後再行奏明辦理至此大出力之將領員弁屢瀕危險備歷艱辛出師於蠻煙瘴雨之鄉奏凱於積雪堅冰之地且將數十年來侵地數百里一旦全行收復功深戰苦較之內地軍務攻城奪隘者其勞績實爲迥異相應籲懇天恩從優議敘以示鼓勵其餘尤爲出力文武員弁兵勇團丁可否容臣等查明彙案奏咨請獎出自

奏稿卷十四

十四

逾格鴻慈所有勦辦馬邊夷匪迭克沙匡一帶夷巢現已及時戡定全境肅清緣由謹合詞恭摺由驛馳奏伏乞

皇太后

皇上聖鑒訓示謹

奏

籌款修理都江堰工摺

光緒三年十二月二十八日

奏爲勘明成都府屬之都江堰關繫十數州縣水利頻年江流泛溢衝毀民田現擬籌款修理恭摺仰祈

聖鑒事竊查江水發源岷山東南入夷地歷松潘理番茂州汶川之境合支流而匯於灌縣秦時沫水爲患蜀守李冰於灌縣西南鑿離畢穿爲二江中築都江堰導水分流藉溉農田其利始溥而水強土弱歷代均須修葺

國朝雍正年間定有歲修之例准其動用公項由官修理按年題銷而銀數無多江流縣長並分內外二支上下百餘里大堰之外旁築小堰甚多官工實難徧及全賴民間自行捐資隨時挑築藉衛田畝計民工數倍官工自咸豐

奏稿卷十四

三

年間軍興以後糧戶於正供之外加完津貼繼以連年捐輸小民竭蹶供億無力兼顧專恃官工補苴罅隙又以經費短絀顧此失彼致二十餘年來江底愈淤愈高水漲輒多泛溢衝刷隄堰沿江田畝時報坍塌小民失業空賠糧賦迭經赴省控訴又每逢雨水稍多之年省城城內卽須行船雖經前督臣委勘飭修因軍饟緊急庫帑空虛實無鉅款可籌未能興辦臣蒞任後復據成屬各士民紛紛呈訴以現在工程緊要民力萬分拮据請將淤墊過甚之江心百餘里懇求發款挑浚其餘各岸工程尙多該紳民等仍願自行集資修理情詞實爲迫切臣以耳聞不如目見灌縣離省僅百餘里隨於本年九月閒輕騎簡從率同署

成縣龍茂道丁士彬隨帶熟悉水利之員親詣都江堰詳細履勘見內外兩江節節淤墊較舊時江底高至一二丈及八九尺不等兩岸沙灘上與田齊亂石縱橫中流阻塞灌縣溫江崇甯郫縣崇慶州等處民田衝毀已至六七七十萬畝若不准予挑修非但已衝之田不能復業且恐成都十六屬州縣一遇大水浸成澤國而省城地處下流亦恐淹浸臣查悉工程實有萬不可緩之勢雖刻下庫款支絀而賦出於民民出於田且百姓正賦外加徵津貼已三十餘年收數不下一千六七百萬兩又自同治初年辦理捐輸每年約計八九十萬兩迄今已十餘年收數亦不下一千二三百萬兩此皆出自按糧攤派茲若省一時之費拂

奏稿卷十四

美

萬姓之心使之莫保田廬恐以後津捐難期踴躍殊失遠大之計况該紳民等僅請官爲修理江心此外兩岸堰工仍願自行按戶捐辦以後歲修一切均照舊自爲經理若竟置之不理實不足以對百姓當卽督同委員逐段切實估勘撙節核實統需經費九萬餘兩方能將內外兩江一律疏淘並將坍塌缺堰隄修砌完好保衛十餘州縣糧田爲一勞永逸之舉值此冬令水涸亟應及時興工俾明年春江盛漲不致再行泛濫衝灌良田隨飭現署成縣龍茂道丁士彬親往工次督署水利同知徐傳善署灌縣知縣陸葆德等催集人夫趕緊興工先濬外江限日分段疏淘一面飭令民間接戶集資趕緊築隄堰並分撥駐省之靖武營

勇丁前往工所幫同夫役併力洶淤以期速竣要工臣於  
興工後復親詣該堰指示機宜察其勤惰衡定賞罰各該  
員役民夫等均能踴躍從公惟查司庫空乏異常此項工  
需又刻難再緩臣現商之藩司以正款無可動撥惟有於  
各州縣存寄司庫應領各款內暫行湊銀九萬兩陸續分  
解工次應用將來卽由鹽貨各釐金項下撥還再行設法  
勸捐歸還釐金俾免挪用正款以期節省庫項臣當嚴飭  
各委員等核實撙節不准稍涉虛浮統俟工竣再行由臣  
查驗具奏所有都江堰工緊要設法籌款興修緣由理合  
恭摺具奏伏乞

皇太后

奏稿卷十四

三

皇上聖鑒訓示謹

奏

川省設立機器局片 光緒三年十二月二十八日

再槍礮爲武備要需近年外洋製造精巧便捷實爲禦侮利器川省各營近多習用此槍然皆購自上海各處洋行價值甚貴而又不知修理之法一經損壞卽成廢物殊爲可惜臣前赴川時奏明將候選同知曾昭吉隨帶前來擬設一機器局仿照外洋槍礮之巧如法製造一可免購自洋行受其擡價之病一可將舊用朽壞槍礮隨時整理藉以濟用當卽籌措款項飭曾昭吉於上海揀擇緊要機器購辦數十件由長江駛運來川以資應用其餘機器曾昭吉心思奇巧卽令自行創造現已在於成都省城擇地建造房屋設立機器總局派委候補道夏岑勞文翻總理局務並派成縣道丁士彬會同妥辦其應需經費一切擬不動支正款卽在於川省土貨釐金項下撙節動用惟川省協款過多釐金亦不敷分撥臣復飭鹽道於茶引加票項下設法籌辦藉資小補至該局甫經建造所有需用購運機器及造房各費並委員司事工匠一切薪水工食統俟明春三月局房造成將機器各件安置妥協開造槍礮後再爲奏報並將各用款核實咨部查銷謹附片具陳伏乞聖鑒訓示謹

奏

奏稿卷十四

天

濟楚川鹽礙難加抽釐金摺

光緒四年二月二十日

奏爲川省濟楚鹽商成本已重銷路已窄釐金有關饒源礙難再行加抽現在設法勸商公捐並由省庫先籌墊解以濟豫賑恭摺仰祈

聖鑒事竊

臣

准戶部咨據幫辦河南賑務刑部侍郎袁保

恆咨豫省災廣民眾需款浩繁擬借各省富商銀兩卽請暫緩停止川鹽濟楚加收釐錢以備歸還如還清之後川鹽仍然暢銷卽將加收釐錢撥抵淮課定爲常則經部

臣

議以兩楚例多食淮鹽口岸法變則弊愈生不必輕更成憲至於向章之外加收濟楚川釐以還豫省欠款驟議加徵於饒源有無窒礙並近年川銷暢滯情形及川商是否

奏稿卷十四

无

獲利較厚應由

臣

趕緊查明覆奏辦理等因當卽督同鹽

茶道蔡逢年悉心查議茲據該道詳稱遵卽傳集在省商人告以豫省饑饉情形勉以大義飭議加抽濟楚鹽釐以

濟災賑旋據該商等瀝陳近年運銷楚鹽每引一張完稅

羨銀九兩零需鹽本銀一百二三十兩運費銀五六十兩

川釐減成釐銀四十六兩楚省按觔抽釐以錢合銀約計

一百二十餘兩加以商號人工費用共需銀三百七十八十

兩而川江阻險歷年商運船隻搥損沈溺鹽包多少難計

此項成本尙不在內以楚省現售鹽價計之已虞虧折兼

以楚岸劃分銷路甚窄又川鹽銷岸復准淮鹽行銷楚岸

民食不能再加一文之價商等憑何加納釐金務求憐察

以免歇業等語該道查係實在情形萬難抑勒從事復以救災恤鄰之意反覆勸導始據邊計楚各商共認勉力捐銀五萬兩仍請陸續湊繳一時力難全交等情據詳前來臣查川省從前地丁稅課入不敷出其京協各饒指撥之款甚鉅全賴釐捐以資撥濟而釐金以鹽爲重尤以濟楚爲大宗濟楚鹽釐之衰旺實關川饒之盈絀自淮鹽上運楚岸劃分以來川鹽銷路甚窄銷數日滯商人觀望不前議欲停運前兩年因恐釐金無出貽誤饒精又恐濟楚一停商竈失業變亂滋大不得已將廠渝各處釐金一再核減每引一張共收釐銀四十六兩稍期補救無如川鹽成本甚重楚岸鹽價日落商困終不能蘇臣去秋因力爲規

奏稿卷十四

三

復黔岸之舉以救商窮而顧全局又以川鹽引張積至一百餘萬課稅欠至一百數十萬無從彌補乃爲力清其弊始知引積課懸之故在於加餉因查明川省從前奏定科則每水引一張配花鹽五十包每包重二百觔自同治元年以後商人因各處釐金過重每包私加至三百餘觔暗資貼補臣維天地生財原祇此數此有所盈彼卽有所絀鹽餉加重引積課懸勢所必然乃將鹽餉改歸舊則而爲之酌加滷耗繩索二十觔以恤商情定爲每鹽一包只以二百二十觔爲準永禁私加之弊該商等又以包輕釐重更虞折本紛紛呈懇減釐以救商困而體察情形似尙不能不量從末減是川省現收之釐方議量減何能再議加

增且臣去歲開辦黔邊鹽務成本毫無妙手空空無從設措彼時濟楚之釐可以稍加已早爲設法奏明辦理俾資挹注何至亟亟告貸於東鄂兩省今袁保恆乃請每劬加收釐錢八文或十文是每引一張應加釐錢一百餘串合銀約七八十兩較川省釐數加倍固知豫省待賑孔殷始爲此不得已之請第此時川中情形銷路之窄若彼商力之疲若此欲議加增實有萬難之勢夫商人惟利是圖縱不能多所贏餘亦必稍有沾潤茲若必取盡錙銖則商人勢將停運鹽運一停釐卽中止不但於豫省無所裨益卽秦隴滇黔新疆各軍饗之待協於川鄂者均一旦同歸於盡貽誤實非淺鮮如云楚運一停則淮岸可復豈非幸事

奏稿卷十四

三

不知楚運停後廠鹽卽無處出銷井竈必因之歇業則目前川省數十萬貧民託此爲業者一旦生機頓絕後患尤不堪設想是商運一停關繫時局者尤大正不獨釐金無出之爲可慮也臣謂賑款固當預籌而饗項尤宜兼顧極爲切要之論臣連日揆度商情參以時勢如必勉強加抽既有礙於各省饗需並有關於川鄂大局殊未敢輕爲嘗試惟是豫省災黎待哺情殷際此情勢萬分喫緊何敢稍分畛域因爲公捐協助之議勸諭商人茲旣經承認捐賑銀五萬兩是該商等尙能深明大義惟據稱捐款一時難繳若必待其繳齊再行解豫誠恐緩不濟急計惟有在於司鹽兩庫應解各省協饗內先行勻撥墊解以應要需

一俟將來捐項收齊再行撥還原款庶可濟豫省目前之急而於川鄂饑源時局亦無大礙除將墊款銀兩飭令司道趕緊籌解並分咨外所有川省濟楚鹽釐萬難加增並另行勸商公捐暨籌款墊解緣由理合恭摺具陳伏乞  
皇太后

皇上聖鑒訓示再此摺係爲賑務緊要謹由驛五百里馳奏以免遲誤合並陳明謹

奏

奏稿卷十四

三

江長貴安徽省建祠片

光緒四年二月二十九日

再據四川按察使方濬頤等稟稱原任福建陸路提督

臣

江長貴四川潼川府鹽亭縣人由行伍擢任千總咸豐年間出師廣西轉戰江鄂皖浙等省殲除巨寇立功垂二十年其最著者尤爲皖南一役咸豐四年七月閒江長貴奉調援皖連克建德東流等縣時部勇僅五百名髮逆號數十萬攻陷祁門黟縣下竄休甯江浙險要全失江長貴以祁門爲江浙糧道一旦梗阻有關大局乃激勸勇丁入城固守聲言大軍不日齊到以安人心而懾賊膽髮逆聞風遠竄不敢回犯大軍糧運賴以疏通迨徽州巖市街之戰江長貴以寡擊眾身先士卒奮勇直前賊眾四面圍槍礮如雨江長貴身受重傷十六處猶手刃悍賊五名督勇四路衝殺斃賊無算賊遂狂奔重圍立解嗣後每戰必克疊復名城皖境之得就肅清江浙等省軍糧不致缺乏多賴該提督血戰之力至今皖人稱道不衰該提督於同治二年由福建陸路提督開缺回籍蒙

奏稿卷十四

三

恩賞食全俸於光緒二年二月二十九日在籍病故經前護督臣文格奏明在案該司方濬頤及成都府知府徐景軾均籍隸皖省追念前功感懷不置與在川同鄉府廳州縣各官合詞稟請具奏懇於該司等原籍地方建祠致祭等情前來臣查該故提督江長貴由行伍出師粵西轉戰江皖等省迭著戰功洊升提督而於援皖一役尤爲力顧

東南大局以少勝眾保全地方厥功最偉茲皖省在川各  
官咸願於安徽建祠致祭藉伸感慕情出至誠合無仰懇  
天恩准其於安徽省立功地方建立專祠由地方官春秋  
致祭以順人情而彰忠盡出自  
鴻慈理合附片具奏伏乞

聖鑒訓示謹

奏

奏稿卷十四

書

奏銷展緩寬免經徵各縣處分片

光緒四年三月二十九日

再臣前以滇黔兩岸鹽務廢弛引積稅懸請將新舊邊引改由官運商銷先於黔邊試辦俟鹽本可敷騰挪再籌滇岸當經酌擬章程十五條奏明准行並接部咨此次開辦官運應將本年鹽課准其展限造報其富順等州縣處分亦令展限開報等因茲查自官運開局以來黔岸銷路漸形暢達惟官運成本異常支絀不敷周轉滇岸仍難兼顧而歷年額行滇引積至三十餘萬張光緒三年分又頒滇邊陸引二萬五千一百五十四張一時既不能併歸官運又難以別覓銷岸引未配運稅羨虛懸轉瞬奏銷期屆勢難依限造銷據鹽茶道蔡逢年黔邊鹽務局候補道唐炯議照黔引奏銷展限成案詳請奏展前來臣查滇邊引岸因官運成本難籌未能與黔岸同時開辦去秋已有先黔後滇之奏此時專辦黔岸運本尙覺不敷何能遽行接辦滇岸該道等所陳係屬實在情形合無仰懇

天恩俯准將滇引奏銷一併暫行展緩俟滇岸開辦後再行照例造報所有經徵之健爲等縣處分暫予寬免出自鴻慈除咨部外理合附片具奏伏乞

聖鑒訓示飭部查照施行謹

奏

拏獲重慶瀘州巨梟片

光緒四年三月二十九日

再川省川東一帶水陸衝繁私梟最夥近年以來句結益眾到處橫行又復燒香結盟與各路會匪通氣抗官拒捕其勢漸不可制亟須及早殲除以遏後患查著名巨梟重慶以下以江大煙桿羅憤懣譚登心楊海亭爲最瀘州以下以譚二瘋亡任韋駝任長蠻爲最而譚二瘋亡江大煙桿又係著名會匪該匪等糾眾販私已十餘年譚任各匪則盤踞於瀘合江永一帶江羅各匪則出沒於巴江涪合夔萬一帶動輒號召一二人或數百人均置有槍礮器械礮船拒敵官兵從前劫搶殺人官幾不敢過問卽有團保呈訴輒肆殺害以致鄉民畏不敢言匪蹤益爲叵測疊

奏稿卷十四

三

經前督

臣

飭派兵勇查辦七八年來迄無弋獲三年正月

內匪勢日熾前護督

臣

文格飭派前虎威營勇勦辦到

任後接據稟稱三月十七日偵知譚任各匪大股紮踞合江白雲場龔姓宅院當卽督隊圍攻該匪等閉門抗拒飛擲甌石施放洋槍勇丁多有受傷隨經拋擲火蛋入內一時火發該匪始突門蜂擁而出與官勇短兵接仗力戰三時之久斃匪九十三人生擒匪首羅憤懣曹三楊海亭譚登心田椿三張經元王懋懣胡義懣八名並餘匪等三十八名奪獲槍礮軍械九十七件救出被擄團總王北軒團約陳理仁趙元先等多人營勇陣亡一人受傷六十餘人而譚二瘋亡任韋駝仍乘閒逃逸請飭查拏等情

臣

查該

匪一日不除川省後患滋大第其兇狡異常實難遽獲當經嚴飭永甯道延祐督飭瀘州合江富順等州縣各派勇團會合營勇四路圍拏並嚴定賞罰以期必獲三年十一月初十日據署合江縣知縣楊作霖瀘州知州田秀粟等稟報該匪譚二瘋亡率黨竄至合江縣之胡槽山該縣等帶領勇團會合營勇極力圍攻斃匪多名並將該匪譚二瘋亡任長蠻立時生擒派員解省訊辦詎譚匪解至資陽縣在監病故卽經委驗明確批飭戮屍傳首梟示瀘合一帶其拏獲之匪首羅憤懣等多名當飭瀘州訊供實係夥搶有年且係陣前擒獲罪無可逭均於審明後正法以快人心其任韋駝一匪先經查明自合江白雲場擊敗後逃

奏稿卷十四

三

至黔省一帶意圖勾聚

臣

一面飛咨黔撫

臣

飭屬會拏復

飭瀘州田秀粟多派幹勇跟蹤追捕旋據稟報於四年正月二十五日在貴州丹江地方會合該處團練將該匪拏獲解回該州解省審辦至江大煙桿一匪占踞重慶小三峡地方路僻江險跣緝倍難前據川東道姚覲元稟報三年三月十四日探知該匪糾眾數百人潛竄萬縣之武陵場搶劫鹽商文子英鹽店並擄去店夥文宏寬等拒傷汛兵鄧崇武身死並傷夔州副將吉恆帶領往捕之兵共十四名駛船順流東下當卽飛飭副將張廷芳帶勇三百名並撥礮船七哨分水陸前進五月初九日探明該匪船駛赴巴縣之文華沱停泊該將等分勇水陸圍攻該匪撐駕

礮船十餘隻逆流迎拒相持許久陸路之勇會同巴縣李  
玉宣所帶練丁齊上水師礮船併力交攻巴縣六品軍功  
勇目蕭貴帶勇奮力迎擊轟沈匪船四隻溺斃夥匪百餘  
人餘始敗潰上岸分竄復經兵勇追殺十餘人奪獲礮船  
四隻軍械五十餘件水師兵勇共受傷二十四名查訊江  
大煙桿仍復脫逃等情臣以江匪狡悍素著經此懲創恐  
其遠颺外省潛句會匪隨飭各屬四路確探卽據巴縣知  
縣李玉宣探的該匪已竄赴陝西漢中府城固縣一帶當  
經檄飭漢中府知府林士班一體飭屬會拏李玉宣又派  
練目蕭貴帶領勇役兼程潛往密稟該府林士班該縣徐  
德懷添差協緝該府縣等隨卽親督差練星夜圍捕將江

奏稿卷十四

三

大煙桿卽時擒獲稟報遞解來川訊據供認糾眾販私多  
年搶店殺人拒斃官兵不記次數隨於訊明後正法傳首  
重慶各處梟示用昭炯戒此先後拏獲重慶瀘州兩路巨  
梟及殲除兇黨之實在情形也臣查歷來私梟釀成太患  
該匪譚二瘋亡任韋駝江大煙桿任長蠻等既係著名巨  
梟又係著名會匪結黨日多兇骸益熾已成鴟張之勢若  
不及早殲除流毒將不可收拾今幸按名擒獲一無漏網  
卽匪黨亦殄滅無遺實爲川省翦除大患現在川東各處  
匪蹤漸淨江路一律肅清洵堪仰慰

宸廑惟此次辦理各員弁以十數年未獲巨憝數月之內  
均能設法次第擒除匪黨亦悉數殄盡實屬著有微勞而

漢中府知府林士班城固縣知縣徐德懷於鄰省巨匪不分畛域督勇協拏尤爲出力相應籲懇

天恩俯准將在事出力各員從優議敘以示鼓勵出自逾格恩施所有拏獲著名梟匪會匪譚二瘋亡江大煙桿任韋駝等並將悍黨殲除盡淨水陸一律肅清各緣由謹附片具奏伏乞

聖鑒訓示謹

奏

奏稿卷十四

三

再川省向多法國傳教之人此外各國洋人素不經見自英人有西藏探路之約以後來川遊歷者日見其多去歲英員吉爲哩麥士呢爲能欲由藏回國貝德祿欲赴夷地詢訪夷人均經中途設法阻止前進幸皆就我範圍自後英人萬道福等行由巴塘赴藏亦經諄囑委員婉爲勸阻改由滇省而去以免多事本年二月初間英員貝德祿由重慶起程前赴嘉定銅河並峩邊越雋打箭鑪各處自赴老林打獵經臣飭令洋務局由省派員前往照料護送該英員執意推辭復飭沿途州縣安派差役挨站接護而該英員每多中途改道且多不由大路行走每於人迹罕到

奏稿卷十四

早

及曾經封禁之路自與跟役一二人銳意前行護送之人勸之不可而沿路行蹤詭秘所到之處詳繪地圖並與法國教士往來甚密現據稟報仍在打箭鑪小住尙不定其何往臣竊維英人蓄意開通西路由來已久此次先由附近邊隅以次漸進將來道里旣熟必多不情之請且西藏各處據各塘務委員來稟多有不准洋人由彼行走之說日後該洋人如必欲道經彼路保護之法頗費躊躇查西路情形與東南各省迥異東南各省出口均係大洋居民絕少入口卽是中國地面彼固無人攔阻我亦易於防閑西路則均係陸地且自川省打箭鑪以至前後藏中間八九千里盡屬番夷部落夷性反覆日後該洋人來往彼地

無論自彼至藏或自川至藏攔阻之處必多臣惟先行嚴飭塘務各委員遇有洋人由川赴藏必婉詞勸阻阻之不聽則設法隨時保護並知照駐藏大臣妥爲辦理惟查西路至藏全係陸地而由藏至五印度相距不過一千數百里近聞英人於東印度孟家拉之東開拓新境名曰阿賽密阿賽密之東北境距西藏邊界不過數百里而近若果如此則數年之後必將直抵藏境臣日夜籌思似不可不先事預防惟預防之法非先將其地山川形勢之險易徑途道里之曲折以及人民性情之強弱了然心目毫無舛誤則胸無把握卽按舊圖考核亦多不可靠臣現擬仿照滬津兩處派員帶人出洋赴各國學習機器算學之舉

奏稿卷十四

聖

遴訪精習輿圖熟諳算學儀器一二人由前後藏過廓爾喀折至中印度徧歷東西南北各印度循恆河而東至孟加拉東之阿賽密東北境再溯藏江而返歷布魯克巴及貉狗野人之地以達於南墩俾其將各該處山川形勢徑途道里以及民人情性一一詳繪總散地圖並詳細貼說俾全蜀西南形勢可以周知庶以後遇事區處較有定見至所派之員臣已選得江西貢生黃楸材於地圖儀器算學各項深得泰西祕妙且耐勞喫苦亦異常人從前江西學政臣許庚身曾經保送擬卽派令該員前往必可將各該處一切形勢考究無遺以備採擇惟中國派員出洋遊歷必須由總理衙門先行照會該國公使查照茲臣派員

前往印度各處係屬英境如蒙

俞允仰祈

飭下總理衙門先行知會該國公使查照並知照到

臣

卽繕發執照卽日飭黃楸材起程前往臣爲探悉洋人屬  
境與中國邊境形勢起見是否可行理合附驛具奏伏乞

聖鑒訓示謹

奏

奏稿卷十四

聖

革職留任謝 恩摺 光緒四年五月初八日

奏爲叩謝

天恩仰祈

聖鑒事竊臣於光緒四年四月十四日接准吏部咨以臣

奏請開復已革候補道員李耀南原官頂戴交臣差遣未

將該員從前參革緣由聲敘含混保請有違定章照例議

以降三級調用係私罪不准抵銷覆奏奉

旨丁寶楨著加恩改爲革職留任欽此臣跪誦之下感激

屏營當卽恭設香案望

闕叩頭謝

恩伏維臣因素知革員李耀南才尙可用當此時事需人

奏稿卷十四

聖

之際若竟置之閒散似覺可惜一時冒昧懇

恩未將該員原參情節詳悉聲明含混之咎實所難辭部

臣議處極爲公允乃渥荷

聖慈

仁施法外

破格加恩

重寬其昏謬之愆

曲示以矜全之德凡此非常之

隆施實非捐糜所能報臣撫衷循省感悚交并此後惟有

遇事謹慎益策駑駘竭其心力之所能爲以冀稍答

高厚生成於萬一所有微臣感激悚惕下忱謹恭摺叩謝

天恩伏乞

皇太后

皇上聖鑒訓示謹

奏

奏稿卷十四

四

遵 旨查覆劉長佑參款摺 光緒四年五月初八日

奏爲遵

旨查明雲南撫 臣 潘鼎新陳奏各情恭摺覆陳仰祈

聖鑒事竊 臣 於光緒三年十一月二十一日在軍機大臣

字寄光緒三年十一月初四日奉

上諭潘鼎新奏滇省饑項艱難自總督劉長佑到任驟添  
楚營糧饌數倍於滇勇力不能支提督胡中和所部勇多  
缺額逼索欠饌該督有心袒庇營勇驕恣日甚臬司倉景  
愉於衙參時被親兵揪扭提鎮副參出入必乘綠轎經人  
告發該督置之不問補署差委於滇省將弁概存意見該  
督所帶鄉人魏鼎薰等分踞各局越次陞遷無以服人鹽

奏稿卷十四

聖

法道沈壽榕與魏鼎薰串合鑽營該督之子劉思謙又與  
沈壽榕魏鼎薰及候補知州李光舒同知潘英章等內外  
聯絡奔走勢利劉思謙並私娶民人賴姓之女爲妾尤爲  
滇人口實等語滇省自兵燹後民物凋殘元氣未復總督  
爲通省表率辦理一切於吏治民心均有關係潘鼎新所  
奏各節是否屬實著丁寶楨卽派明幹大員前赴滇省詳  
細查明仍由丁寶楨訪查確切據實具奏原摺著鈔給閱  
看將此諭令知之欽此仰見

皇太后

皇上整飭官常軫念地方至意跪讀之下欽悚莫名謹卽  
欽遵密委在川候補道尹國珍刻日赴滇詳查又恐該道

一人耳目難周復密委候補直隸州知州劉啟鏞候補知縣德安隨同該道前往飭令不動聲色按照原奏所指各節密爲查訪務得實在情形逐一密稟毋得洩漏及草率疏略去後臣一面凡遇滇省員弁來川者謁見時每於無意之間作爲閒談諮訪期與該道等所查情形參觀互證以求確切茲據尹國珍將查明情形具稟前來參以臣所詢訪情形謹爲

皇太后

皇上詳陳之查潘鼎新原奏所稱督臣劉長佑到任驟添楚勇各營其餉項數倍於滇勇而又不能稍有懸欠名爲另請專款實則皆責滇庫墊發司道力不能支積欠商銀

奏稿卷十四

吳

至二十餘萬之多虧累日深實從來所未有一節查劉長佑於光緒二年四月到任維時正值順甯騰越軍務喫緊奏明由廣西帶領楚寶玉武迪字三營到滇提督胡中和於是年七月自川來滇前雲南巡撫暫護四川總督臣文格亦因軍務未靖奏明招募親兵一營作爲中營隨帶赴滇嗣劉長佑以地方未靖兵勇較單又令添募右營親兵一營共是五營每月需餉銀一萬有奇其楚寶一營月餉奏明由廣西協撥迪字一營奏明由廣東舊欠協滇餉項

下按月籌解原奏所稱另請專款係指此兩營而言查楚寶一營自到滇後滇省藩庫實收過廣西銀二萬八千六百兩有零迪字一營月餉廣東並未撥解分釐每月均由

滇省墊支嗣由司道議裁三營經劉長佑以饗項艱窘批  
准卽行裁撤只留楚寶一營駐省城玉武一營駐昭通其  
口糧照黔勇章程銀數略減每月共需銀四千兩有奇查  
劉長佑與胡中和先後帶勇赴滇係因滇省伏莽尙多防  
範喫緊並非無故增添其楚寶迪字兩營由廣西廣東兩  
省籌款接濟均經劉長佑奏明有案楚寶營到滇後廣西  
曾撥解銀二萬有奇廣東則分釐未撥查撥款積欠各省  
皆然撥饗旣不能專指勢不能不向本省籌發劉長佑此  
事似不爲過至楚勇口糧章程本較各省爲多自軍興以  
來厯皆如此劉長佑現留兩營口糧較黔省口糧尙減是  
亦未嘗不念滇省籌饗之艱難力顧大局也又原奏所稱

奏稿卷十四

四

提督胡中和逼索欠饗劉長佑峻詞催迫藩司杜瑞聯嘔  
血數次胡中和勇多缺額劉長佑面告杜瑞聯僅少勇二  
百名耳明知之明言之而不明禁之一節查雲南提督駐  
紮大理府城距省將及千里滇省籌饗旣艱勇糧不能按  
月接濟該提督催饗文書差官絡繹而來所稱急於星火  
者事實有之劉長佑旣見文批卽向司道催令籌解亦必  
然之事緣勇丁必須給饗乃能責其出力雖饗項不濟亦  
不能不爲催領坐聽缺乏胡中和奏明招募之勇欠發口  
糧該提督爲帶兵之員自不得不向藩司咨催劉長佑職  
司糧饗旣見咨催又不能不令藩司籌撥此皆辦公所宜  
似難目爲袒護至胡中和勇不足額因口糧不濟潰散者

多劉長佑係得自風聞卽與藩司相商以提營勇丁聞已潰有二百名之多令速籌遣散經費以便裁撤由是先撤右營後撤中營其該營勇丁數目或先時卽有潰散缺少詢之藩司亦稱傳說不一未敢以風聞爲據至杜瑞聯自川來滇正值春夏之交天氣酷燥沿途感受風邪肺氣上壅偶然嘔血數口旋即痊愈會據杜瑞聯自言實由司庫空乏應放之饗甚鉅商號積欠未還難於再借一時焦急所致並非由提營催促而然卽劉長佑亦未嘗向伊峻責潘鼎新所言或係傳聞之過亦未可知又原奏所稱司道議詳該營旣由四川招募而來其中川人必多若由大理徑回四川路途較近藉可稍省經費督臣與提臣堅言必

奏稿卷十四

嬰

盡回湖南總之提鎮將備大半皆其鄉人互相袒庇虛糜饗需一節查胡中和所帶兩營雖由川招募實係楚軍緣楚人向來應募者多而楚將專帶楚勇又其習慣使然今勇旣裁撤楚人自應回楚庶免流落生事其盤費卽不能不照湖南路費計算是以司道遵議照黔勇章程予以兩月全數口糧銀八千八百餘兩始將兩營全數裁撤惟該兩營原因聞勇有潰散始議裁撤胡中和裁撤勇丁卽應將有無潰散情事詳晰咨明方爲正辦乃一概置之不問輒卽囑圖支領全數口糧以致動人指摘一時議者無不疑其貪詐指爲謬戾臣以此事關繫饗項緊要再三確訪始悉該提督以該兩營勇丁旣由湘入川又由川到滇遠

道相從旋復遣散不免意存體恤惟該提督勇丁以饑項不濟稍有逃散盤費一項該提督遣散支領後仍係全數發給其散勇空糧贏餘聞並未入己仍按名分給現散各勇丁作爲賞需以冀途次不致匱乏別滋事端潘鼎新所稱袒庇鄉人在劉長佑固無是心而在胡中和則不能不謂實有其事也又原奏所稱倉景愉於衙參時被督臣親兵揪扭補服曳至大堂始行釋放並毆其隨丁該勇丁一日譁譟擁至內署督臣與知府魏鼎薰閉門以求良久始散一節詢之署藩司倉景愉據稱二年七月衙參之時該司前赴督署家丁在前行走至儀門外見有親兵在彼坐而未起該家丁用言叱喝親兵意屬不服該家丁用拳毆

奏稿卷十四

吳

打時儀門內有親兵數人聞鬧攏前觀看經巡捕喝散該藩司已至儀門被毆之兵跪而鳴冤該藩司急欲前進該兵牽住袍襟哭訴事誠有之經巡捕稟明督臣將該親兵責革並令隊長帶領與藩司服罪實無揪扭曳至大堂情事又詢之督署當差弁兵人等僉稱實無勇丁喧嚷擁至內宅督臣與魏鼎薰閉門以求之事惟據藩司言曾有親兵在署前口角經督臣傳諭魏鼎薰重責數人潘鼎新摺內所稱或卽此事似係得自傳聞之誤又如原奏所稱提鎮副參出入必乘綠轎經人告發而總督不問一節查永昌協副將唐鳴盛經其本管都司楊鳳岐稟許內有乘坐綠轎之語經督臣檄委迤西道熊昭鏡查辦據副將唐明

盛自稱到任之始因是日陰雨舊傷舉發難以乘騎坐轎  
一次平日並未乘坐旋經該道稟經督臣將唐鳴盛撤回  
並記大過二次且諭通省營員嗣後再有犯者照例懲辦  
現查通省尙無有營員敢坐肩輿者是督臣實無置而不  
問之事又原奏所稱補署差委滇將久已向隅督臣以前  
任舊人概存意見一節查滇省自前督臣劉嶽昭帶有楚  
營因軍務未竣數年以來留滇補用者人數眾多滇中有  
勞績保舉應補署者亦復不少武官定額不敷委用不獨  
滇省將弁候補者有賦閒之怨卽楚營將弁候補者亦有  
向隅之苦劉長佑設法變通查照新定章程有以一二品  
職銜而署都守者有以三四品職銜而署千把者亦以缺

奏稿卷十四

辛

少人多欲求漸次疏通實未嘗稍存偏見此在省人所共  
見辦理似尙公允又原奏所稱督臣所帶鄉人如魏鼎薰  
旣充營官兼理營務饟項旣有沾潤薪水又復重支候補  
知州李光舒委辦善後局務候補同知潘英章派充釐金  
提調未及一年旋補安平優缺該員等以新到淺資分踞  
各處越次陞遷何以服人而昭公允一節查魏鼎薰等實  
係劉長佑同鄉經劉長佑奏調來滇聽候差委復奏請留  
滇補用均先後奉

旨允准在案該員等旣由該督奏調來滇予以差委尙無  
不合魏鼎薰以候補知府管帶親兵兼辦營務是以一人  
充兩項差使原各有應得薪水以資辦公不得謂之重支

惟魏鼎薰管帶親兵任紮督署與督臣為最近李光舒又係督臣親信同鄉訪其不能謹慎持躬常與在省各官往

來徵逐酒食屬實其鑽營串合各情徧查茫無實據至潘

英章一員前在廣西曾經補授東蘭州知州茲奏明留滇

應歸候補班補用原不得以資格論其題補安平同知與

例相符業經部文覆准且以直隸州知州借補同知亦不

得謂之越次陞遷又原奏所稱滇省劣員以鹽法道沈壽

榕為最該員昔年在督臣劉嶽昭幕中劉嶽昭臨行時諄

囑岑毓英加意防範岑毓英臨行時亦囑潘鼎新早為區

處調任撫臣文格自四川寄信劉長佑亦以該道為言湖

廣督臣李瀚章自滇旋鄂沈壽榕暮夜投金經李瀚章嚴

奏稿卷十四

至

詞拒絕劉長佑始亦疑其為人繼因與魏鼎薰串合鑽營

遂竟甘言易入一節查沈壽榕本係候選道員同治四年

經前任撫臣林鴻年奏調來滇後隨督臣劉嶽昭辦理軍

務並未充當幕友至歷任督撫或面囑其人宜防或信中

言宜區處又於湖廣督臣處有暮夜投金之事檢查毫無

憑證詢問又少端倪難以據為定論且劉嶽昭於臨行時

囑岑毓英加意防範劉嶽昭在總督任內何以復向該員

商辦軍事岑毓英臨行時囑潘鼎新早為區處岑毓英在

總督任內何以尙奏委該員署理藩司卽潘鼎新在巡撫

任內又何以不為區處是該員尙無實在劣迹可想而知

論者謂該員為人語言開朗在滇年久歷任督撫臣無不

倚任潘鼎新不能無疑此皆臆度之詞亦不足憑惟查魏鼎薰辦理營務該員又總辦營務既屬同辦一事相與聯絡原不得爲過惟魏鼎薰身居督署與李光舒又有相臨之分嫌疑之際應有區別乃與之親密太甚雖查無謀串營私等事而旁觀擬議卽由此起且該員現署臬司與屬吏時相周旋紀綱亦覺不肅又原奏所稱數月以來督<sub>臣</sub>足不出戶一任其子劉思謙與沈魏等鬼蜮於內李光舒潘英章聯絡於外奔走勢利者相與附和之道路傳聞雖多無據之詞究非避嫌之道劉思謙私娶民人賴姓之女爲妾尤爲滇人口實一節查劉長佑家教尙嚴劉思謙雖居署中並未干預公事亦未與官員往來原摺中所謂

奏稿卷十四

五

道路傳聞多屬無據之詞是潘鼎新亦並無實迹可指至其所娶之妾係四川重慶府民人崔洪義之女旣非滇民亦非賴姓確切有憑查與原奏不符以上各節均因尹國珍查明稟覆又由<sub>臣</sub>訪查確切之實在情形也伏查此案潘鼎新所奏有事出有因者亦有傳聞失實者惟所奏胡中和一節雖催餵係屬因公勇潰亦屬傳聞原不能遽指爲劣迹第胡中和身爲提督統轄全省軍政糧餉皆在內之事乃只顧營勇而不籌大局殊失協恭共濟之義况營勇旣聞稍有潰散亦應查明數目劃清月日算齊口糧依數繳回方昭清白乃一味囹圖支領將盤費一項空糧贏餘作爲遣散賞需雖無侵吞情事然只知見好營勇並不

計及時勢之艱難稍爲節省殊非一品大員公忠體國之道胡中和會經

賞給黃馬鞋勇號相應請

旨褫去黃馬鞋勇號以示懲儆候補知府魏鼎薰候補知

州李光舒一則駐紮督署與督臣最近一係督臣親信同

鄉時與在省各官往來徵逐飲食雖無鑽營串合各情事

惟此時已不知檢束自後能否足資表率均未可定魏鼎

薰李光舒均應請暫行革職交督撫認真察看如果材堪

造就俟績著勞績再行酌量奏請開復現署雲南臬司鹽

法道沈壽榕與魏鼎薰李光舒往來親密雖查無鑽營串

合各情事究屬未能遠嫌且查該員聲名實屬平常應請

奏稿卷十四

垂

旨開缺送部引

見聽候

酌用至潘英章以曾經補授實缺直隸州知州人員留滇

補用借補同知班秩相同核與例符應毋庸議劉長佑之

子劉思謙既未干預公事又未與官員往來所娶之妾既

非部民亦非賴姓亦毋庸議劉長佑雖暫染骹疾而精力

強健如故自抵任以來廉勤自策圖報愈殷整頓吏治經

理戎務耐苦恤民力求上理滇省官吏士庶稱道佩服者

異口同聲是其居心行事昭然共著實屬無可訛議惟魏

鼎薰住紮督署與李光舒等常與各官往來徵逐飲食未

能覺察疏忽亦所難辭應如何置議之處伏候

聖裁所有遵

旨查明雲南撫

臣

潘鼎新陳奏各情理合恭摺覆奏伏乞

皇太后

皇上聖鑒訓示謹

奏

奏稿卷十四

五

松潘番民改土歸流摺

光緒四年五月初八日

奏爲查明松潘廳屬番民改土歸流疆界戶口地畝糧數  
及起科年分恭摺仰祈

聖鑒事竊查松潘廳屬柴門關內外郭元壩等十五寨番  
民前請改土歸流及附近漢民無糧地土一體納糧當差  
並加學額經前任總督臣吳棠會同前成都將軍臣魁玉  
等委員勘查明確於同治十二年十二月二十七日合詞  
具奏奉

旨交部議准令將保甲差徭戶口民數地畝科則及應辦  
事宜另行妥議分別奏咨辦理並取具該廳及漢夷各結  
送部等因復經轉飭查議去後茲據布政使程豫轉據署

奏稿卷十四

五

松潘廳同知劉廷恕將該漢番疆界戶口地畝糧數逐層  
分晰查明造具清冊加具印結並聲明該漢番等散居各  
處請免逐戶取結等情到司該司查冊開柴門關內外一  
帶漢民番人改土歸流地方共十五寨東南與甘肅文縣  
屬夷地接壤西北與口外生番毗連各寨離松潘廳城三  
四五百餘里不等番民馬成子等及附近漢民張光朗等  
共一千二百零五戶男女共五千五百六十七丁口山地  
共二萬五千五百五十九畝七分所有人民地土均已撥  
歸松潘廳管轄編入漢甲惟所轄俱係低窪下地其每歲  
完納丁糧議照該廳南坪等處下地科則每畝徵銀一分  
一釐仍加徵一五火耗每歲計共徵正耗銀三百二十三

兩三錢三分一釐六毫九絲遇有閏之年按月遞加共應徵正耗銀三百三十二兩八錢七分六釐二毫九絲一忽二微零俱隨同松潘廳丁糧一併徵解該漢番等自同治九年勘查定案後卽於同治十年起科至光緒三年計共七年已據漢番民人按年如數完納由該廳解司另款存儲俟光緒四年奏銷時入於該廳額徵丁糧冊內造報所有附近南坪之芝麻塘隆康塘等處番地民人昔年認完青稞折淨米一十三石四斗一升今旣改土歸流完納丁糧前項青稞應請免徵其保甲差徭一切事宜悉照腹地章程一律辦理該漢番等散居各處應請免逐戶取結以省煩擾由司將齎到冊結逐一核明詳請奏咨前來

臣查

奏稿卷十四

奏

松潘柴門關內外番民自雍正年間受撫涵濡

聖澤百數十年傾心向化咸願改土歸流與附近漢民均自同治十年起各照內地之例輸納糧賦年清年款毫無蒂欠實屬情出至誠所有疆界戶口地畝糧數應卽查照部議奏咨立案其舊納青稞未便重徵合無仰懇

天恩勅部開除准予豁免以示體恤除冊結咨部外謹會同成都將軍宗室

臣

恆訓署提督

臣

聯昌合詞具陳伏乞

皇太后

皇上聖鑒訓示謹

奏

